



Ella tenda da fiasta han ils visitaders schau gustar la pulenta cun caschiel, la ligiongja-casa da Fidaz ed autras bunas caussas.

FOTOS A. BEELI

La fiera dil sulegl d'atun

A Sagogn ein tschiens stai el quartier da Casut

■ (anr/abc) Las previsiuns dall'aura ein buca stadas bunas per la sonda. Ei dueigi plover gl'entir gi. Stau eis ei tut auter. Quei ha ina raschun: La fiera d'atun da Sagogn ha spuentau la marcort'aura. Tut che fa curvien e surstat da quei fenomen: La fiera d'atun da Sagogn ei in garant per la bun'aura d'atun. Gia la 23avla gada ha quella giu liug sonda vargada. Dapi silmeins 15 onns eis ei adina stau schetg quei gi. Quei encunter tuttas prognosas che havevan indicau era uonn puspei ch'ei plovi dalla damaun tochen la sera. Puspei eis ei stau schetg. Aschia han ils visitaders puspei saviu spassegiar tras la streglia da Casut senza parisols. Uonn han ins constatau empau dameins stans da marcadonts. Sco quei

che l'unioni da traffic che organischa mintg'onn quell'occurrenza ha informau l'anr han silmeins tschun stans annullau lur reserlvaziun per in plaz. Probabel havevan ils biars temiu l'aura.

Aschia eis ei stau uonn empau pli lartg cun ir tras la fiera. Denton nuotatonmeins interessant cun marcadonts da lunsch e da maneivel. Uonn ei il Club Selva staus en roda da menar l'ustria dalla fiasta. Ei setracta dall'unioni dils curriders da cuorsa liunga. Tier els ha ei denter auter dau ligiongias da cuer da Fidaz, pulenta cun caschiel d'alp ed autras caussas gustusas. Ils responsabels ein s'exprimi fetg cuntents cugl andament dalla fiera e cul success da lur engaschi. Al stan dalla Pro Sagogn han ils visita-

ders saviu degustar e cumprar must frestg. Sco quei ch'il president ha confirmau ha l'unioni vendiu 600 liters malada dultscha dils curtgins da Sagogn. Era las pizzas ed ils products dil pistrin Casut han puspei anflau gronda accoglientscha. Leu stattan biars mintgamai colonna per cumprar il paun e la tarschola che vegn direct ord il fuorn dil quartier. La fiera d'atun da Sagogn ha puspei strusch sentiu la «concurrENZA». Ella ha liug mintg'onn il medem gi sco la scargada gronda giu dil Crap da Flem. Era a Sagogn ei la muaglia turnada sonda suentermiezgi dallas alps giu el vitg. Igl ei stau ina biala manifestaziun dil puresser che ha piars diltut sia muntada d'antruras.



Ei ha nuota pluiu sco previu: Pign e grond ei s'entupaus ora el liber, denter auter han ils sunatibas Muntanialas divertiu musicalmeins.



Visitaders denter flurs e ligiongias: In dils bials stans decorai alla fiera da Sagogn.



Al stan dall'unioni Pro Sagogn han ins saviu degustar 30 sorts meila e pera.

FOTOS A. BEELI

La «Veta gloriosa» ei battegiada

Rees Coray e Pascal Gamboni han presentau lur nova ovra

■ (anr/ac) La veta gloriosa ei sepresentada il vendergis vargau el Cinema Sil Plaz a Glion. Pascal Gamboni e Rees Coray han presentau lur nova ovra musicala communabla. Da «Spargnus amurus» entochen «Anavos è nagliu» sesanflan 14 cumposiziuns sil disc cumpact ch'ei vegnius battegius cun in pugn plein zenslas poeticas. Il fiug vid la preit dalla localitad da kino dil Cinema Sil Plaz era bein artificial. Nuotatonmeins han ins beinduras giu il sentiment da seser il vendergis vargau entuorn il fiug e tedlar las novas imaginaziuns musicalas dil duo Coray/Gamboni. Cunzun enaquella ch'els han puschiu communablamein cun Severin Brugger il toc instrumental «Artg». Cun la «Veta gloriosa» cuntinuan ils dus musicists ina collaboraziun musicala ch'ei semantifestada gia avon entgins onns en in disc cumpact. Pascal Gamboni e Rees Coray han, tenor atgnas indicaziuns, luvrau si per il niev disc cumpact differents ovras elavuradas el decuors dils onns vargai. Omisus han contribuui las atgnas imaginaziuns musicalas e sche quelas ein s'accordadas ha la canzun cattau siu plaz ella «Veta gloriosa». «Nus essan sespruai da far in pass anavon.»

En quei pass anavon ein ils dus musicista denton stai fideivels a lur credo, ad ina ferma simbiosa da musica e text. «Se-capescha che quels dus elements ein d'impurtonza eguala.» Buca da far curvien ch'els dus musicists han battegiu il vendergis vargau lur niev disc cumpact cun in pugn plein zenslas da pupi, il pupi sco fundament poetic. Gia il tetel dil disc cumpact tradescha empau ina egliada satirica sin il mintgagi human. La veta gloriosa semantifestescha els texts sco per exempel ella canzun dil «filosof». «...

in filosof, in filosof, el dat troccas dalla otg, sa uss drovas ina decisiun, ina buna, ina cun visiu». La veta gloriosa cuntegn canzuns ton per engles sco per romontsch e schizun ina en lungatg talian, schegie che quella canzun secumpona da sulet ina construcziun. «Non mi amo piu». Igl ei senza dubi ina dallas fermezas dils texts e las canzuns dil duo Gamboni/Coray, cuort, denton buca meins pregnant.

Il cavacrappa sisum il vitg

Las ragischs musicalas da Gamboni e Coray pon esser vastas e globalas. Tonpli cuntengan ils text il colorit local per turnar tiel filosof. «Quella giacca vai schon dagitg, survegniu dad in bien amitg, cavacrappa da sisum il vitg». Al local appartegn era il lungatg romontsch ed en special tier Gamboni il dialect tuatschin. Omisus musicists han puntuau che davos l'elecziun linguistica dalla canzun schai negina calculaziun. Ton Gamboni sco Coray vesan lur lungatg sco part dall'atgna identitad e per omisus eis ei pli sempel da mantener l'autentitad cun las atgnas ragischs. Satisfatgs ein omisus dalla actuala scena musicala romontscha. Ina che seigi s'instradada grazia al chant au tour, chantauturAs rumantschas sin turnea. Gest Coray ha gia sunau en formaziuns cun beinprest tut ils representants dalla scena da muisca romontscha. El attribuescha a musicistas e musicists romontschs dad esser en bia graus pli libers e pli spontans e da far gest quei ch'els valeteschien per convegnent. En quella direcziun semova era il duo Coray/Gamboni sch'els intoneschan il refrain ... «anavos è negliu...».

Sper ils concerts dalla fin dalla jamna sepresentan Pascal Gamboni e Rees Coray ils 29 da settember a Turitg el Kochareal.



Ina oda alla veta gloriosa, la nova ovra da Rees Coray e Pascal Gamboni.

FOTO A. CADONAU

reclama

Lucas Zukunft.



www.gruenewirtschaft.ch